

四庫全書

集部

欽定四庫全書

集部

梁谿集卷一百二十四

二至

詳校官庶吉士臣張溥

侍讀臣孫球覆勘

總校官知縣臣

楊懋珩

校對官中書臣

潘奕雋

膳錄監生臣

徐莊

欽定四庫全書

梁谿集卷一百二十一

宋 李綱 撰

書十五

與趙相公第一書

與趙相公第二書

與趙相公第三書

與趙相公第四書

與趙相公第五書

與趙相公第六書

與趙相公第七書

與趙相公第八書

與趙相公第九書

與趙相公第十書

與趙相公第一書

伏被尚書省劄子誤蒙聖恩有江西帥守之除實自陶
鎔推挽之賜佩服厚德第深下情某憂患之餘衰病相
仍志慮凋落豈復堪為世用昨者還自湖湘得腰足重
脰之疾步履艱難以故杜門不出謝絕人事今三年矣
近來復感瘴癘寒熱交攻眩瞶併作使之力疾承命必致
顛仆道塗上辜朝廷委寄已具奏辭免外敢望鈞慈特
賜敷奏使安於閑散以便醫藥不勝幸甚

區區微懇已布前幅重念某自朝廷艱難以來誤蒙委任不敢辭難雖在流離困厄之中願報國家之意未敢少忘也今者上恩隆厚廟堂加察起於閑廢付以一路兵民之重固願黽勉趨承圖報萬一實以抱病之久精力頓衰積憂熏心動輒遺忘深懼臨事乖錯無以仰副驅策上䟽力辭期於得請敢望鈞慈洞察誠悃曲賜開陳特垂矜允不勝虔禱之至

竊見朝廷除授悉出至公此誠中興之基而宗社無窮

之福也然謀帥之際濫及罪戾之餘深恐不足以協士
夫之論方今人材衆多可畀方面之寄者初不乏人求
之前宰執公忠靜重臨大節而不可奪如秦觀文求之
侍從黼亮警敏敢任大事如李端明付以閫外之權必
能稱職舉以代某實允公議敢望鈞慈特加亮察

與趙相公第二書

伏蒙寵誨北報寧謐去歲旱災之廣有可慮者仰見愛
民憂國之誠第切歎仰天下事惟相公留意則夷狄旱

瞋之患有不足弭借易及此不勝惶恐

某三具奏辭免恩除不蒙矜允且被親筆趣行黽勉就
道第迂拙有素臨事踈濶衰病之餘精力弗強使當一
路兵民之寄大懼曠失以速罪戾惟仰賴鈞慈有以覆
護之使不至殞越莫大之幸伏冀亮察

近准尚書省劄子以某具奏請覲得旨矜從十年流落
之餘廼獲造行闕望清光實出鈞造第深銘佩將遂俯
伏下風以承誨約慰平昔願見之心尤深欣抃區區所

懷非面稟莫既萬一

與趙相公第三書

某頓首再拜孤遠之跡蒙恩許令入覲實自陶鑄更蒙
誨諭尤戢厚德非晚遂有瞻望衮烏以慰平昔願見之
心預深欣浣區區所懷諸候面稟

某歲除受命本欲單騎之任適海寇遽犯福之閩安人
情驚擾寓居城外相去密邇遂有挈家之謀上元日起
離長樂又值陰雨連綿山路崎嶇幾於寸進今已幸脫

閩境數日間可至上饒自三衢登舟順流而西度此月
下澣之初可到行在伏蒙問勞之渥仰佩眷意不勝下
情傳聞江西去歲旱災之餘民戶流移物力凋耗贍養
屯兵賑濟飢民極難料理自非仰賴朝廷應副其何以
濟俟到行在詣都堂呈稟伏冀照察

與趙相公第四書

某比者蒙恩入覲濫被零獎仰荷吹嘘因獲造諸屏著
瞻望袞繡之華伏蒙鈞慈眷遇良渥屢開東閣使得款

陪讌語佩服盛德拳拳之情無以為喻益遠門闌敢冀上體注倚善衛生經茂對寵光以慰中外之望

違去鈞範忽踰兩旬嚮仰之誠未嘗少置途中嘗具咨目干瀆鈞聽計獲呈徹某已於二十日到界首交割職事訖縣力薄材當此艱阨之際大懼無以仰副朝廷委任之意既荷鈞慈力賜推挽更冀有以終始其賜不勝幸甚區區懇悃謹具別紙伏冀垂亮

江西去歲旱災次於湖南而南昌視一路為甚流移至

多道路相望田畝有至今未耕墾者縣巨阡陌詢之父老以謂前此未嘗有也中下戶往往乏食牛具多已不存種麥亦甚稀少未知向去何以接濟雖蒙朝廷許撥饒州上供米一萬碩本路遣人船般取得回報去已支遣盡撫州建昌軍萬四千碩比到亦只存數千碩勸誘上戶數亦不多此去秋成尚遠賑濟殊為缺乏已具奏乞於浙西江東朝廷有米斛處支撥三萬碩本路自差人船般取仍得嚴戒諸郡應副庶幾不失指準莫大之

幸伏望垂念

某近蒙朝廷委以營田敢不悉心以圖報効本路諸色拋荒田土至多已委州縣盡令剗刷但初建之初非寬降錢本使得招召佃戶置賣牛具贍養耕種之人何以能趁時營辦以為永久之利伏望朝廷特降錢本十萬貫文付本司措置俟將來就緒日計算本息以本歸朝廷以息充本路支費庶幾有營田之實而非特文具而已已具奏并申尚書省外敢望鈞慈早賜指揮施行不

勝幸甚取會到洪州月支錢米六千餘貫石倉庫空然
米僅有數碩錢僅有數百貫某到任之初茫然不知所
措自非朝廷委漕司應副三兩個月容某旋行措置向
後財計決致踈虞某不足惜深恐誤事仰累相公推挽
之德切望鈞慈特為敷奏早降指揮不勝幸甚漕司見
有總制司錢物可以應副與椿岳飛錢糧自不相妨敢
冀垂念干瀆惶恐之至

與趙相公第五書

四月六日

某已次豫章交割職事仰託芑輝規模具在得以遵守
良深感服第此方當早暵之餘種種缺乏殊非前日之
比願言有以誨督之使免於罪戾莫大之幸無緣躬受
約束但有瞻跂

本路唯臨川建昌去歲薄熟今春耕種亦漸成次叙贛
上雖稔然頗為盜賊所擾民頑多不輸納自餘諸郡率
皆旱災下戶種藝無本田萊多荒而豫章倉庫空匱尤
可駭瞻養官吏軍兵錢糧既無指準而賑濟斛斗又復

缺乏深慮將來有誤歲計近被親筆詔書令勸諭停蓄之家減價出糶既已奉行又措置勸民入納專欲以賑濟給下戶之無本者但恐所得莫能徧及已具狀奏及申朝廷乞降錢米以濟目前之急必蒙矜允今再開項條具仰干鈞聽敢望垂念不勝幸甚

虔寇尚未靜盡昨得李山一軍屯駐頗能破賊徒黨稍稍潛伏近李山既為岳飛勾回餘孽無所忌憚遂復出沒而又袁吉臨江建昌之間飢民往往竊發千百為群

今已十五六項深慮凶歲易為嘯聚滋蔓難圖申世景
一軍僅千人自遣一半往虔吉間自餘無兵可以措置
累具奏乞就近差撥三二千人應副使喚未奉指揮敢
望鈞慈早賜差撥以慰一方顙望之意不勝幸甚

與趙相公第六書

近蒙朝廷令運司應副一月錢米大濟目前之乏仰荷
鈞念不勝下情然運司所得止可以相兼充一半之費
蓋申世景一軍雖有丘贄錢糧窠名本州前後登帶支

遣並無分文顆粒見在皆是旋行擘畫應副所以尤覺
費力今運司既已無有又不敢仰煩朝廷支降輒伸前
懇乞降茶引如元請之數庶幾不致狼狽敢望鈞慈以
舊治為念特賜矜從非特某受賜也喋喋浼瀆第深悚
息

本路近來雨澤霑足但下戶乏本種田殊可矜念州縣
所養多坊郭游手之民雖能全其性命不填溝壑然不
若實惠及農夫使將來有秋可望前此累嘗拜懇乞於

鄰路有米去處支撥三萬碩正為此曹設也萬一朝廷
缺米輒援呂相例乞支降茶引十萬貫當自招誘客旅
趁此時入納應副賑貸敢望鈞慈特賜矜允不勝幸甚
近被受密院劄子備坐都督行府指揮所乞軍馬候防
秋日發遣令先招填係將不係將禁兵訓練使喚已依
稟施行緣本路缺乏之甚所有招填例物及贍養錢糧
非干告朝廷何以能辦已條具畫一申請敢望鈞察招
填新人既未必能敷額又旋行訓練非年歲間安能習

服將來防秋須得督府如期遣軍馬庶幾可以倚仗上
流重地任責不輕更望鈞慈特賜垂念

虔吉間以抽回李山軍馬頗復紛紛已遣副總管康隨
分撥人兵前去措置然兵力單弱深慮不能彈壓累乞
先差三二千人付本司分擘使喚實非得已近降劄子
亦已關送都督行府儻非朝廷特賜指揮勢決難得敢
望鈞照干浼惶恐之至

與趙相公第七書

少懇仰干鈞聽漕司督催本州積欠錢米皆是某未到任已前拖欠之數本州缺乏之甚近者干告朝廷令漕司應副方能粗了目前支費宣復更有錢米以還舊欠已具事因奏聞及申朝廷乞降指揮銷破蠲免自某到任以後督責諸縣收簇樁辦決不敢復有稽違伏望鈞慈特賜矜念早與行下不勝幸甚

夏已踰半防秋之期甚近而本路全無軍馬所以捍禦之策茫然未知所措日深悚惕雖蒙都督行府有許遣

兵之文亦未蒙津遣前來深慮緩急決至誤事契勘舒
蘄黃三州係聽本司節制實為江西蔽障之地舒州係
劉光世地分蘄黃州係岳飛地分並不曾屯駐軍馬欲
乞朝廷特降指揮令光世分兵二千駐劄舒州岳飛分
兵四千駐劄蘄黃兩州皆聽本司節度庶幾將來二大
將移屯合淝襄陽本路不至為敵人之所窺伺已具狀
奏聞及申朝廷敢望鈞慈特賜矜允一路生靈不勝幸
甚

與趙相公第八書

累奉詔旨以江西旱災令廣賑濟及勸誘積粟之家減價出糶某與諸司協力奉行幸已就緒已具狀申尚書省今有投進劄子輒錄副本拜呈幸望鈞悉

邇來雨澤滂沛早稻已熟秋田可望米價頓減人情少蘇實廟堂措理之效良可喜也第去歲災傷地分頗有不曾陳訴之民懼催理欠負至今不敢歸業本司已行下州縣覈實與免催科庶幾流移悉復田里亦已申聞併

冀照察

某累以本路合差軍馬上干鈞聽蒙關送都督行府再得督府劄子見議差撥然到今未有至者非特盜賊滋多乏兵分遣又以防秋在近全未有備日夜悚惕恐辜朝廷委寄之意今再具申稟敢望相公致一言於右相早賜差撥實一路生靈之幸也亦有奏劄條陳利害謹錄副本致左右機政之暇特賜采覽

撫似之迹仰荷推挽誤蒙任使自到豫章行將三月宿

病間作心力不強深慮曠缺以貽朝廷之羞今幸賑濟就緒雨暘調適遂成豐年於此時求去以養衰病似無嫌避已具狀奏聞乞依舊在外宮觀敢望鈞慈特為敷奏使得養疴山林保全晚節莫大之幸敢冀鈞察

與趙相公第九書

七月初九日

某閑退之久乍當繁劇加以承早暵缺乏之餘種種料理不無違拂人情去處諒多謗讟塵溷鈞聽今則財賦粗足官兵俸米既盡支本色料錢亦排日支給庶幾自

此浮言稍息然迂拙有素多招意外之謗更望鈞慈覈實而審察之不勝幸甚因呂侍郎書中嘗道鈞意仰荷愛念故敢僭易及此惶恐無地

某衰病無堪強顏於此雖不敢不黽勉自力以副朝廷委任之意終恐迂踈仰負使令近已具奏乞依舊外任官祠尚未報行敢望鈞慈早賜陶鑄使得息迹山林實荷終始之惠豈勝幸甚干冒惶恐

累以本路防秋缺兵控告朝廷及都督行府近得行府

劄子許差王彥一軍但須候其到乃始差撥今王彥尚在荊南秋期已至深慮道里遼遠虛費日月軍馬有往返跋涉之勞雖已再具申稟緣行府已巡按淮上恐得報後時有失事會敢望朝廷特賜指揮得專遣使臣齎劄命迺邈前來截留一路不勝幸甚伏冀垂念

近以洪州積欠錢米干聞朝廷伏蒙鈞慈悉皆蠲免自非相公留情舊治察見本末何以及此某與一州士民同受大賜豈勝感激目前雖不至乏絕然防秋之計殊

無贏餘已嘗援例申陳更望特賜矜察幸甚

與趙相公第十書

八月三日

昨蒙朝廷差到統領官何球即時依稟就申世景軍中
差撥軍馬令往虔州措置群盜未行間適報筠州管下
盜作因令就便前去措置本人全不以捕盜為意公然
招收亡命冒請錢糧沿路作過搔擾民戶至有強取財
物牛畜殺傷平人恐其生事檄令歸司歇泊又自擅往袁
州招安所為愈甚本司別差將官馬仙前去措置適得

大理寺公文根究何球盜用官物凡二十餘次劄下令以職事交割與馬仙訖回歸並不聽從不免先次勾回軍兵及委提舉茶鹽趙大夫隨宜措置差人勾押前來昨日方到本司已送所屬根治俟見情節續申朝廷乞重賜行遣以為將佐之戒敢望鈞慈特賜照察

梁谿集卷一百二十二

欽定四庫全書

梁谿集卷一百二十三

宋 李綱 撰

書十六

與趙相公第十一書

與趙相公第十二書

與趙相公第十三書

與趙相公第十四書

與秦相公第一書

與秦相公第二書

與趙相公第十一書

九月七日

伏讀詔書竊審車駕時巡郡國躬勞將士諒惟扈從跋

履良勤神用某拘守郡章不獲望塵瞻嚮行館第深仰
跂伏幸照察

某承乏江右忽將半年左支右梧粗免曠敗實賴鈞庇
之賜第防秋是時屢告朝廷乞遣發軍馬雖蒙都督行
府累劄許差至今未有到者方車駕巡幸江上本路當
上流重地尤不可無兵以備不虞除具奏陳外輒以咨
目條具利害仰塵鈞聽及遣屬官羅薦可詣朝廷稟議
伏望鈞慈曲加照察特賜矜從一路不勝幸甚干冒惶

恐

本路盜賊雖此豐年猶未衰息尚有結集敢窺伺州縣
良以習俗頑悍喜報仇怨利掠貨財不顧刑法而本司
軍馬單弱無以鎮服之所致近者措置王權將招安頭
首解發赴都督行府軍前使喚復擒獲宜春劇賊所謂
黃顛叔者與其黨百餘人餘盜稍戢但顛上殊未靖耳
昨蒙行府許先差撥數千兵前來討蕩既出榜告諭頗
有懼意久之軍馬不到知非實然又復紛紛深恐江上

或有警報則為患不細近蒙省劄委以相度措置輒以已見條陳利害申稟伏望鈞察

本州城壁久不修治類多頽毀又太濶遠自城北一帶皆是空閑去處難於保守累具狀申朝廷乞降度牒措置修葺及截去濶遠空閑去處未奉指揮今時月已迫不免將安撫司錢米那允支用收買材料燒變磚甃及工役夫力並不及民謹具圖申呈伏望鈞察所乞度牒并昨蒙朝廷指揮令製造軍器合用錢物亦累具申請

併望行下支給不勝幸甚

與趙相公第十二書

某稟目頓首再拜平章都督僕射相公閣下昔賈誼有言曰守圉捍牧之臣誠死城郭封疆又曰彼且為我死然後可與之俱生彼且為我亡然可與之俱存聖人之有金城者比物此志也夫為守圉捍牧之臣而死城郭封疆此固常理然死或重於泰山或輕於鴻毛方其平時請于朝者無不從也所以為守之之具者無不備也

不能則繼之以死宜其有鴻毛之輕至於請于朝者不從所以為守之之具者不備徒假牧守之虛名初無捍圉之實用則志節之士所處此者宜如何哉某自十數年來憂患相仍加以朴陋迂踈動輒齟齬所願安於閑散休影息跡不復敢與世故去年冬誤被上恩付以江西一路重寄力具辭避不蒙矜從賜對便朝更膺殊獎實自相公推挽之賜所以力疾之官黽勉就職者亦願砥礪鴛鴦圖尺寸之報也自初到任適當旱暵之餘帑

庾匱乏夙夜自竭簿書錢穀冗瑣細碎必親必躬方稍就緒幸此歲稔粗免曠敗亦皆相公庥庇之德心非木石寧不知歸近者上章引疾丐罷降詔不允訓辭有邊吏戒嚴商秋俯及之語夫防秋在邇豈守牧之臣可為去就之時然某之所以求去正以防秋之故何則叨冒大帥之名而無其實故也某昨具奏乞元置安撫制置大使司軍馬錢糧之半蒙朝廷闕送都督行府行府劄下初則曰俟秋高調發軍馬繼又曰見議遣兵繼又曰

俟勾王彥一軍到日分撥前去今則曰候有緊急日遣兵應援是朝廷之兵不可指擬也初乞兵日蒙朝廷及行府皆降指揮許招填本路缺額禁軍勾抽使喚數月之間極力招填纔得六百餘人近緣漕司申請錢糧復令權罷諸州不隸將兵數既不多隸將之兵以虔吉盜賊之故復難調發是本路之兵不足倚仗也夫以上流重地去淮南及偽境不遠沿江千餘里要害之地並無甲兵可以控扼守禦方邊報警急倉卒擾攘之際乃欲望

遣兵應援於數千里外不亦晚乎某竊料相公之意不
過謂楚泗廬壽襄鄖諸將屯宿重兵則江西為內地探
報偽黨無數路深入之計則江西可無虞故兵不必遣
是大不然夫七尺之軀要在腠理千丈之堤潰於蟻穴
所以防患者常在不防之地豈可以江西稍內而盡弛防
守之備哉況諸將列屯相去絕遠使敵人乘間為擣虛
之作不知孰肯為援朝廷不預遣兵使自為防守而置
一路於度外恐非計之得者自用兵以來敵人張大聲

勢探報妄傳分兵以入某路則往往無事深藏固閉匿壯示弱探報無所得則往往深入今信探報而不為一路之備是僥倖其不來尤兵家之所忌也敢望相公特垂鈞慮重念某靖康間被命宣撫兩河得兵二萬人方欲有所施設鼓作兩河之人以捍大敵然不為用事者所喜議論不合自出師纔五十日即丐罷去其後謗議紛紛然其未嘗辨明於俯仰不愧者以無其實故也紹興初蒙恩起廢宣撫荆廣得兵萬三千人招捕羣盜者

數萬亦不為用事者所喜到官纔數月以言者罷去其
後謗議亦復紛紛然某亦未嘗辨明於俯仰不愧者亦
以無其實故也今某幸蒙上恩委寄又荷相公知獎豈
不願圖涓埃之補然軍馬單弱財用窘乏曾無以副其
區區願效之心竊自歎息藉使勉強偷安以僥倖萬一
不幸稍失支梧致有缺誤則平時仇怨群起而交攻之
真無以自解矣此所以夙夜震懼而不遑啓處也更望
相公曲加照察謹遣本司幹辦公事官羅薦可具瀝懇

烟告于行府伏望鈞慈特與定議如本路合遣防秋軍
馬即乞早賜摘卯前來應副擺布控扼庶無噬臍之悔
如不合遣亦乞明降的確指揮無使日夕指準悞一路
士民之望而某得以早為去就不勝幸甚干冒鈞嚴無
任惶恐某稟目頓首再拜

與趙相公第十三書

十月一日

伏審光奉朝廷還昇魁柄大慰中外之望竊以國步艱
難之際淮軍叛散之秋上思讜言登庸舊弼所以妥妥

廟社綏靖人心使國勢增隆必自有道佇觀施設以副
具瞻區區不勝傾依之至

淮西叛將出於意外實非細故某輒不自揆嘗奏䟽指
陳朝廷措置失當夙夜憂懼以俟譴訶乃蒙寬恩降詔
獎諭尤切震悚進見邸報言事者論右相引漢武誅王
恢事以為比竊謂太過深慮隨時獻說者浸失本旨而
避退講和之說復行則宗社安危未可知也輒復上章
以救其失惟是出位之言實為有罪迫於憂憤有不能

自己者輒錄二疏副本拜呈敢望鈞覽如有可採得補萬分之一不勝幸甚僭易惶恐論者皆謂宰相還朝必守前議請車駕還幸平江及覩近降指揮改撥廬壽盱眙米斛並於建康府交卸又謂且抽回淮南軍馬沿江屯駐某竊謂朝廷措置因時制宜必不如此藩籬未固百物未備以一捷之故而遽臨建康誠太早計相公爭之是也今既駐蹕幾年徒以淮西叛將遽復捨去使寇偽得以窺伺非良策也第當撫綏將士益務全養靜以

待之江北屯重兵則江南可以奠枕江北無兵而與賊
共長江之利則國勢危矣第當抽回老少以就糧餉最
為得策敢望鈞慈特賜詳酌恕其僭易不勝幸甚

某以憂患之餘誤蒙朝廷起廢帥守江西已涉兩年夙
夜黽勉左支右梧幸免曠敗實賴鈞比今秋雖旱幸不
過甚米價亦不翔踴贛上盜賊蒙朝廷易守蠲免租賦
盡罷科須渠魁次第公參復業境上羣盜亦皆擊散吉
撫筠袁間有名字者悉已招捕了當雖有些小殘黨留

兵彈壓無能為也而某自春及今衰病日深醫者謂勞心太過所致七上章丐閑庶得休養未蒙矜允今宰相公還朝洞照情素輒敢力陳前懇敢望鈞慈特為敷奏使得遂其所欲不勝幸甚均望矜念惶恐無地

某自春夏以來久苦瘡瘍纔幸稍安忽得足弱筋攣之疾步履蹇緩拜跪艱難至今未愈又苦痰眩煩憤健忘復成淋疾醫者謂憂慮勞心所致所以力丐閑退政欲少就全養尚有安理不然日復一日遂成痼疾不可為

也謹錄自春迄今乞宮祠章疏塵浼鈞聽庶幾照察引疾丐閑非在今日敢望相公矜憐曲為敷奏特從所請儻得歸休山林保養病軀不至顛仆於道路皆門下之賜也干瀆鈞嚴不勝惶恐

某承乏於此實一年有半仰荷朝廷委寄之意不敢不勉自到任以來賑濟勸誘以活飢民修築城池創建營房繕治器甲措置錢糧招捕盜賊種種皆幸就緒獨立於風波動搖之中不意自全非仰賴庇庥何以及此已

開具措置事件釐為六狀奏聞庶幾朝廷知其請閑非
敢有所規避謹以副本錄呈敢望鈞慈特賜詳酌不勝
幸甚

與趙相公第十四書

閏十月二日

朝廷累年經營恢復之計漸有氣象而以措置一失當
之故淮西之軍盡歸偽境國勢稍弱上心感悟召還元
弼復畀魁柄政猶羸瘵之人非得活國之手厥疾弗瘳
然理義人心之所同然號令施設犁然有當於人心則

不約而自服轉弱為強以啓中興之運有不難也相公
留意天下幸甚

某以非才誤蒙朝廷委寄一路自今春以來援疾求去
至于七八近復上章遂乞掛冠實緣衰病非敢飾辭上
恩隆厚未忍弃捐屢降詔旨不從所請敢不力疾黽勉
以圖報萬一然本路實為上流重地當寇偽乘間窺伺
之秋軍馬單弱無以控扼萬一有賊馬衝突何以待之
輒具防冬事件仰干朝廷其間乞兵一事尤為最急如

蒙摘那可用兵將五千人與見管者相兼使喚某雖不
武願當一面不能即繼之以死報上恩兵將無有雖留
某於此無益也願先罷黜實不敢虛受重責伏望鈞慈
特賜矜察惶恐無地

議者多謂朝廷以張俊屯淮西以岳飛保上流則江西
乃為內地又謂萬一賊馬渡江力不敵即退保以避之
是皆不然岳飛雖有保上流之名而無其實去歲所遣
蘄陽水軍纔數百人安能控扼今歲猶未至也張俊雖

進屯淮西而舒蘄江黃未聞有重兵以為捍蔽江西最
為虛處豈得不預為之備退避之說不可施於今日如
豫章九江不能固守而事退避則撫吉筠袁諸郡皆將
為賊占據豈可復得也如朝廷必欲固守則願假某以
所亡之兵如置一路於度外則夫人而可為帥似不必
堅留於此非不知朝廷新失淮西之軍兵將缺乏然摘
那於當用去處有不可已者某頃在湖南吳錫為統制
官頗諳使喚如得差撥不勝幸甚不然即別得一項軍

馬亦可敢望鈞慈曲賜應副情迫辭切惶恐無地

本路盜賊招捕略盡近日贛上又擒獲殺散所謂劉宣
劉花等者虔賊自此當少衰矣唯袁之萍鄉吉之永新
與湖南接界尚有數火人數亦不甚多已遣屬官前去
措置督捕會合兩路軍馬討殺庶幾靜盡得免曠弛實
自鈞蒞所及前此本司招捕盜賊逐火了當本房簽書
官及人吏皆隨功狀蒙朝廷推恩自某到任並未曾申
陳今類聚招捕盜賊火數千告朝廷乞量與推賞庶幾

有以激勸伏望鈞慈幸察

本司累申朝廷乞降指揮催促岳飛分兵屯駐九江至今未有到者近日光州等處探報賊馬漸有渡淮作過者諸縣頗遭虜劫蘄黃一帶並無障礙如九江重地豈可缺兵往年馬進占據用兵攻討半歲廼克今不早為之備一旦殘破廼圖尅復豈不勞費如岳飛之兵果不可分即乞朝廷別差一項軍馬屯駐防托在今日守臣尤宜得人謂當權時之宜選差有名望武臣為守使之

措畫竊見承宣使劉錫沈鷺有謀諳練軍政儻蒙朝廷
驅策必有可觀非特一路之幸敢望鈞慈特賜照察

與秦相公第一書

某頓首再拜啓竊審車駕時巡郡國親勞六師有煩
舊弼典司留鑰根本之地遂增九鼎之重諒惟眷注之隆
行即登庸復畀魁柄以穆天緯中外之望非獨區區荷
照知之所私願也

某再拜上啓區區承乏豫章行半年矣幸此歲稔目前

粗可支梧近上疏丐閑蒙恩不允迫於防秋及聞車駕
順動未敢堅請儻幸今冬無虞為歸歟之計決矣何當
瞻晤少奉至言遡風不勝依仰之至

與秦相公第二書

七月二十四日

某頓首再拜衰晚無堪濫膺閫寄初無善狀日俟譴訶
誤蒙上恩俾之遷秩無功之賞實不敢當力具奏辭免
不蒙矜允迫於威命龜勉祇受愧溢于中載惟叨冒出
自樞密相公推挽吹噓之賜銘佩之情何有窮已輒裁

短啓以叙謝悃伏幸鈞覽不勝悚息

某自春夏間苦瘡瘍為梗近復中濕得筋攣之疾行步
拜跪皆有所妨此衆人所見非敢有所托加以痰眩動
多遺忘憂患之餘血氣凋耗自應如此深慮當一路之
寄有誤國事累具奏乞置閑散未蒙矜允敢以劄子上
干鴻造伏望鈞慈特賜敷奏使得脫此繁劇休養衰疾
莫大之幸冒昧惶恐

某區區所懇實出誠悃非以備禮素荷眷照之厚必蒙

矜察如江西日來盜賊漸息豫章財賦料理亦粗足用
非不欲尸素以度歲月實以衰病有不能堪者一路委
寄之重有非踈拙所能任者自非投誠於公誰復見憐
去歲嘗致書趙相輒敢錄呈伏幸鈞覽竊見李光瑞明
雅有方面才置之海隅未厭士論如以代某必有可觀
併望垂念幸甚幸甚

某悚息再啓本路自今春虔寇猖獗千百為群僣顰者
紛紛本司遣發兵將漸次招捕今已盡獲其首領惟李

安靜者最號狡猾勢已迫蹙乞受招安更旬日間可見
次第區區素無指蹤捕盜之才實賴朝廷威德將士効
命所致輒具劄目拜呈將士功狀繼此以上併望鈞念
秋色已深朝廷守禦之備計已有定議如九江上流重
地車駕駐蹕建康此地豈可不宿重兵以為控扼諒惟
規畫部分已畢本司初不曾被約束指揮輒具申稟
敢望鈞旨詳酌行下不勝幸甚

本路得李貴步諒兩軍彈壓討捕虔寇庶幾今冬不敢

倡獫然步諒錢糧已蒙朝廷以月椿應副李貴一軍未
蒙指揮州縣窘匱實無寬剩可以趲那元係福建軍馬
如許令用上供錢物養贍却令福建椿發上供於事為
便更望鈞察李貴者近為賊所中傷乞尋醫養疾願選
差有名望統兵官付以此軍庶幾緩急可以使喚併乞
垂念

某以本路利害數事奏陳謹錄副本拜呈皆係於邦本
不可不煩朝廷留念者相公以身任天下之重願賜鈞

察

某再拜啓張柔直近過此以贛上缺乏為言本司輟那
萬緡五千斛應副既至廬陵又以聞贛上缺乏之甚不
肯進不免再以三千斛及朝廷鈔引錢濟其目前之急
今聞已到官矣如贛上有盜賊之擾及官吏失於措置
倉庫匱竭誠可駭聞若非朝廷支撥應副其何能濟亦
嘗開具申陳必蒙照察也

梁谿集卷一百二十三

欽定四庫全書

梁谿集卷一百二十四

宋 李綱 撰

書十七

與張相公第一書

與張相公第二書

與張相公第三書

與張相公第四書

與張相公第五書

與張相公第六書

與張相公第七書

與張相公第八書

與張相公第九書

與張相公第一書

某衰病無堪誤蒙鈞慈力賜推挽俾當帥守之任自顧
闕然何以仰副朝廷委寄之意感愧之情無以為喻比
已交割職事仰託大比庶幾免於罪戾辱眷素厚更望
有以覆護之不勝幸甚

江西當去歲旱暵之餘種種凋弊到任之初錢糧尤為
缺乏支給官吏軍兵體料錢米月計六千餘貫碩養申
世景一軍久依此數之外而倉庫枵然並無儲蓄急缺

之甚自非朝廷行府輟那應副次難支梧必致生事輒具狀申稟敢望鈞慈特賜矜察推其贏餘以濟難窘少紓目前之急非特某之幸實一路之幸也干瀆不勝惶恐

本路當控扼之衝實為上流重寄自來屯駐重兵支降錢糧色色寬裕近年分撥軍馬付之他將轉移錢糧為之一空緩急之際何以支梧伏蒙朝廷以所乞軍馬缺送都督行府至今未奉指揮兼虔州殘黨向存近岳飛

勾回李山一軍復肆猖獗加以凶歲饑民易為嘯聚袁
吉建昌之間復有竊發者頗多申世景軍馬止千餘人
分布招捕不足深慮勢漸滋蔓將來難以撲滅已具狀
申稟乞先次輟那三二千人應副使喚伏望鈞慈深加
照察早賜施行顓望之情以日為歲不勝千懇之至

昨陛對日得旨措置賑濟務令實惠及民近又祇奉親
筆詔書令勸誘上戶減價出糶見遵稟聖旨施行緣下
戶乏本耕鑿已漸失時升合之濟未能有補已一面措

置勸誘上戶入納錢米以助賑貸使下戶有本種田將
來秋成可望方可不誤歲計容措置就緒續拜聞次幸
冀鈞照

與張相公第二書

四月二十一日

某衰病無堪不復敢與世故蒙相公推挽之力感德難
勝然到本路之初倉無見糧帑無積鏹日支月給皆無
指準殊難措置雖蒙朝廷撥到茶引錢二萬緡以目前
米價計之纔可糴千有餘石正可充月給六分之一縣

道括刷民間勸誘皆已殫一輒具劄子干瀆行府願推
贏餘以濟數月之窘使目前用度不缺乃可為將來永
久之計敢望鈞慈特賜軫念一路之幸非獨某受賜也
惶恐惶恐

寵諭所乞軍馬錢糧俟至秋間發遣仰荷盛德以爲
喻然虔吉州自抽回李山軍馬後羣盜復出沒作過袁
州為攸縣賊所侵凡五千餘人臨江建昌亦有嘯聚者
通計度萬數申世景一軍止及千人已遣五百人前去

招捕深慮軍馬單弱不能成功如范汝為楊么之徒皆是微時不治遂致滋蔓竟煩朝廷遣發大兵所費不貲已具狀申行府乞先差撥就近三二千人付本司相兼使喚庶幾羣盜早得殄滅亦可訓練為將來防秋之計敢望垂念早降指揮不勝幸甚

某輒有論財用數事具劄子申稟又有論兵劄子副本仰瀆鈞聽幸賜采覽

竊以相公膺大任綰重權以圖恢復大計正宜虛已廣

謀以屈羣策願聽逆耳之言勿受遜志之語則輔成中興之功不難致矣某特荷照知願為直諫之友以裨補萬一言或激切幸冀容恕而察其區區之心可也冒昧不勝惶恐之至

與張相公第三書

竊審鈞旆嘗渡江犒師至承楚間伏計已遂還轅方此隆暑跋履衝涉不無勞止防秋在邇措畫捍禦益勤神用更冀保養粹和定而後應茂建中興之基天下不勝

幸甚

某承乏豫章行且兩月遠託鈞芘幸免曠敗種種料理
不敢憚煩粗已就緒唯是錢糧缺乏適當新陳不交之
時極為費力又防秋之期不遠茫然未知所措日以悚
惕蒙許遣兵仰荷垂念賴上盜賊紛紛雖未懲創得乘
此間暇時措置討捕誠為得策將來沿江或有警急而
本路腹心之中亦非細故也更望早賜指揮差撥幸甚
累具狀申行府乞於劉光世岳飛軍中差兵將屯舒蘄

黃不唯此地不可缺兵本路藉其蔽障而三郡乃其所
部輟那軍馬似未為過敢望鈞慈特賜行下一路幸甚
本路昨蒙朝廷於饒州支米萬碩守臣占吝不肯應副
已累申朝廷乞就沿江有米州軍支撥至今未奉回降
指揮今再具狀申行府方此急缺之際得此萬斛庶幾
少蘇敢望指揮行下江東都轉運司支撥應副幸甚疊
疊干冒朝廷但有惶恐

被受行府劄子委令招填本路缺額禁軍見已遵依施

行緣本司全缺材武使臣可以部轄訓練欲依將兵法
辟置部隊將等具狀申稟敢望鈞慈特為早賜指揮行
下幸甚

與張相公第四書

某悚息再拜某衰病無堪誤蒙上恩付以一路之寄實
自相公愛憐推挽所致銘佩之情無以自喻黽勉於此
亦既累月適當早曠之餘措置料理升合分文收支均
節莫匪躬親久蒙朝廷應副粗能支梧日前於預為防

秋之計則茫然未有指準素多思慮日夕憂惕遂覺心
氣不寧宿疾間作深恐曠缺復致人言以貽朝廷羞今
幸賑濟就緒雨暘調適有豐年之望於此時求去似無
嫌避已奏聞乞依舊宮觀差遣敢望鈞慈特為敷奏使
得養疴山林保全晚節則終始之賜莫大之幸也恃照
與之厚輒敢及此惶恐惶恐

某再拜啓累以本路合差軍馬上千鈞聽兩被行府劄
子見議遣兵仰荷垂念今去秋不遠深慮必待有警急

而後遣決致緩不及事江西重地也正兵萬人既不為多舒黃蘄三州就劉岳軍中分兵駐泊事勢又順敢望特加鈞慮早賜差撥一路幸甚有條陳利害奏劄謹錄副本納呈伏幸省覽某以多病情況不堪決為去計猶敢以此浼聞誠以一路利害實係國家休戚不敢以將去而默默也萬乞照察

某再拜啓某昨者既以狂瞽之言仰瀆天聰又以副本塵浼鈞聽過蒙采納褒予之厚益深愧懼昔秦穆公還

自嶠而作秦誓諸侯之事耳聖人取以繼三代王言之
後誠以其言合於道也相公好善受言無愧古人求於
近世數十年來蓋未之有此某之所以私竊仰服至於
喜而不寐也近嘗復以迂踈之論裨補萬一方此震悚
被來教知必照察其精誠其心乃安更望相公持以不
倦以屈羣策則功業光大輔成中興何難之有僭易及
此實賴深眷惶恐無地

某再拜伏蒙紙尾垂諭徐為後圖鈞誨及此策慮盡善

夫復何道以愚意料之今歲敵必南牧定戒前日之無功改動其轍則吾之所以應之者亦豈可守株岳侯移屯襄陽則上流一帶盡無軍馬控扼緩急何以相應援此相公之所當深慮也本司乞兵數日一申非敢煎迫實以事勢已急不得不如此果蒙願指日下調發到此已是七月間兵須拊循而後可用不拊循而用之雖韓信亦須背水出奇非常道也如得吳錫輩素嘗使喚者尤為幸甚切望留念吉州戰船沉江中已半年餘損壞

已甚有狀申稟乞付本司拆造防江庶猶可用亦望指
揮惶恐惶恐

某惶恐伏蒙鈞慈特有頒貺衣着茶藥多品禮意勤腆
在於菲陋何以克當第深悚感既不敢固辭又無以致
答惟當時以藥石之言仰報盛德耳昔孔明下教曰諸
君第勤攻吾短庶幾蜀可治而中原可復願相公無忘
孔明之志則所以永安宗社而大庇生靈者必有在矣
惶恐惶恐

某惶恐某竊見交子之法初若可行其後官私皆受其
弊而卒於不可行與其至於不可行而後改曷若未行
而罷之為愈也崇觀間蓋嘗行之矣然未幾改法則是
不可行之明驗也某輒具劄子論其利害敢私布於左
右相公以天下為任而眷倚之重言無不從願以一言
告上及未行而罷之則生靈蒙福何可勝計切望垂念

與張相公第五書

十八日

竊聞諸大將近已渡江分戍淮上岳侯已趨襄陽臂指

之勢既成首尾之應必至敵雖未戰勝負之計已決矣
方今國家之安危繫於相公相公之勲業係於此舉所
願真而後發無欲速無見小利量敵而後進慮勝而後
會則敵在目中恢復之功不難致也某素荷照知不勝
祈懇之至

劉光世移軍合肥岳飛進屯襄陽去江益遠全無控扼
緩急何以應援某累具申稟乞差撥軍馬非獨以本路
乏兵之故如襄陽一軍財賦仰給本路糧道經由蘄黃

沔鄂乃咽喉之地如使賊兵窺伺乘虛驚擾無兵將以捍之則一路財賦何由得糧道阻塞大軍坐困其所係非細故也願相公深思愚言勿吝遣兵使某得以竭盡區區少助萬一莫大之幸今再具劄子塵瀆鈞聽幸望加察

與張相公第六書

七月六日

近者專人上狀伏計獲塵聽覽六月初所遣人還特蒙貶損誨翰所以慰勞有加佩服眷情止以為喻竊審鈞

施北渡總制羣帥已臨盱眙雖祖逖濟江誓掃清中原
裴度視師志不與賊俱生方之精忠未足多道更望料
敵制勝以謀為先克建大功以副睿主委任恢復之意
天下幸甚軍事方興願言總大略省細故保養粹和與
國同休益受多祉區區傾頌

某承乏豫章忽忽三月偶未曠失實自輝芘所及早稻
既稔之後公私少寬措置財用支梧目前亦不至缺乏
但秋氣已至防守之具闕然人情不安反以見尤所以

頗有申稟誠非獲已今蒙剴命欲遣王彥一軍非荷垂
念一路何以及此豈勝銘佩近亦深慮諸大帥已移屯
淮上恐行府未必有兵可分惟此一軍方順流而來似
可截撥以副急缺嘗因疾置冒昧有請度今猶未到也
先承鈞慮之及感服之深何可言喻然必待到行府然
後差撥誠恐往還虛負日月且軍馬有跋涉之勞到此
後期或致失事今再具狀申陳伏望鈞慈詳酌止令就
便赴本司分擘防秋及討捕盜賊使喚事定即發還麾

下或別有措置亦未晚也惶恐惶恐

王彥者聞頗忠勇善馭下但中間緣錢糧缺乏部曲有
開散者如蒙鈞慈許存留於此責以來效必肯竭力以
防捍一方然昨屯駐荆南係四川財賦贍養今本路州
縣財賦以應副岳侯大軍已為窘迫須得指揮轉運司
以係省不係省上供等錢米樁簇應副乃可不致缺乏
亦具申稟敢乞垂念

本州以去歲旱暵之後倉無顆粒之儲今雖遵依前降

指揮受納早米然所得升合之耗僅足月支官兵糧食
更無贏餘以備防秋緩急用度近嘗申稟乞許本司隨
苗帶糶庶幾少有儲蓄以待不虞敢望鈞慈詳酌行下
今歲之稔倍於常年乘此機會不可失也如待將來乏
絕旋行措置即已為兼并之家所蓄不得已而科敷即
所擾多矣伏幸裁察

別紙蒙下詢非相公虛已廣謀何以及此大抵兵家臨
機制勝難以預料以弱為彊轉危為安止在俛仰之間

昔謝元破苻堅百萬之衆只緣苻融之却陣周瑜赤壁之勝只緣風便可以縱火此豈可預料哉要之臨敵慎重行師以律者其本也見機而作應變無方者其機也不貪近功以圖大利必勝之舉也願相公思之近世治兵有可恨者設將太少與兵太多設將少則難制服與兵多則難運掉必欲用兵無不如志要當反此恐須不免上煩料理

與張相公第七書

二十一日

伏承垂諭諸師進屯措畫大略一二不勝歎仰士風不
振勇者孤進隋者偷安莫相應援遂使巨寇積稔逋誅
而恢復之功未建者職此之由某前䟽所論正為此設
也今者號令既行臂指之勢既順則捍禦侵軼乘機決
勝亡不可者非相公威德足以服之未易致此然蜂蠆
有毒盜賊多智更望臨敵慎重於不必備處過為之
防不勝幸甚

伏蒙寵諭遣發軍馬仰荷鈞念某累具申稟本路不可

無兵利害事理之極諒蒙照察近具劄子論岳飛移軍襄陽財用糧餉仰給本路使秋高江上有警無兵捍禦則州縣騷動何所取財糧道梗塞何由可達一軍坐困此行府所當憂也利害尤大前劄恐未達鈞覽今再錄呈又恐鈞慮謂江東兩軍既行事體相若此大不然江東去偽境遠前有大兵蔽障而又去朝廷行府近緩急聲援可及本路去偽境近江南北並無兵控扼而又去朝廷行府遠此不可不察也惶恐惶恐

本路比來雨暘以時早稻既獲其收數倍常年米價頓減人情少蘇但以秋期在近方朝廷用兵之時控扼絕無軍馬不免惶惑又前此數年類屯重兵今獨無有士大夫往往以此見責實無以答之虔吉間盜賊紛紛日滋所由此故敢望鈞慈特賜矜察於所乞軍馬中先次差撥數千人及秋初至此以安人心以弭物議或諸師下未可差師乞於麾下摘那不勝幸甚前所陳乞於劉岳軍中差兵屯駐舒蘄黃州事理似順併望垂念

某近以賑濟勸糶就緒衰病日甚不敢當一路重寄已具奏聞乞依舊在外宮祠未奉指揮然不敢以欲去之故苟簡減裂在此一日則料理一日之事如招填卒伍教習訓練制造器甲修建營房措置錢糧之類皆漸成次第仰託大芘庶免曠責惟是士風未靖奔競苟得尤覺過於往時辟缺不足以副其求供須不足以滿其意則往往造為謗讟以務中傷此尤非患難之餘所可堪者如蒙鈞慈矜照借以一言之重使得脫此憂惱復自

遂於山林之間實荷始終之賜悚息悚息

與張相公第八書

七月十一日

竊審鈞旆已次龜山庚伏在候諒惟匿泊不無勞止軍事方興切望保嗇精神以靜制動定而後應以建不世之勲以成中興之業不勝祈懇

近准行府劄子許撥差王彥軍馬討捕羣盜且為防秋之計一路受賜豈可具言然必待到行府而後遣即有道途往返之勞且虛費日月誠恐有失事會已具狀申

稟恐或有阻滯未到今再申明敢望鈞慈詳酌許令王
彥到江州日就便赴本司不勝幸甚如蒙開可乞差使
臣齎劄命迺遷前來告示王彥軍中及付本司照會幸
冀垂念

臨江軍申蕭建功者實有文學節操為士人之所推稱
內翰朱震江東都運向子諱皆深知其為人本司及轉
運司保明申奏朝廷乞依近例收召審察必有可觀今
具申行府敢望鈞慈更賜詢訪特與敷奏不勝幸甚

與張相公第九書

八月四日

秋氣益高軍事方棘諒惟總統措畫不無少勤神用更望保嗇精神以應機變光輔中興之業天下幸甚伏蒙寵諭軍馬仰荷鈞念大兵方列屯淮泗以圖恢復而此地任在江之南某豈不知勢有緩急譬如七尺之軀所當保護者在於腠理江西今之腠理也諸帥聯屯相去濶遠使賊出於乘間搥虛之計正如賊風飄暴傷人倉卒何以支梧以一路十餘郡付一書生使之談笑折衝恐


無此理更望鈞慈特賜垂察某近上章請宮祠未蒙俞
允朝夕再具奏陳期於得請願力賜陶鑄莫大之幸

劇賊王權蘇勝久在湖南江西兩界首作過累經招安
繼復嘯聚人甚苦之近因湖南將官裴鐸殺散以數百
人潛迹山谷依舊作過本司以旗榜委吉守李彌遜遣
人招誘方出公參除放散黨與外有頭首并強壯人三
十三名此曹如放還本土決復嘯聚為患未艾因面諭
以禍福使發赴行府自效已皆遵稟次日首領四人退

悔具狀乞免發遣已送所屬根治違節制之罪其餘二十九人已擢第五名為首領借補進勇副尉遣使臣官兵管押至行府敢望鈞慈特賜指揮將首領一人補正外其餘分刺諸軍嚴加約束有擅自走回者許諸色人捕斬庶幾可絕後患不勝幸甚已具公狀申陳伏望鈞察

某近者不揆輟應詔以八事奏陳迂濶之言顧亦何補姑盡其區區之愚而已謹以副本拜呈幸望鈞覽

體問得王彥軍馬已到鄂渚非晚恐過九江前書累嘗
拜懇欲就近存留不知蒙垂念不竊聞此軍亦多烏合
非王彥不能制之如到行府簡留精銳或遣它將統率
前來亦恐無補於事更望鈞慈特賜加察



梁谿集卷一百二十四

欽定四庫全書

集部

梁谿集卷一百二十五至

詳校官庶吉士臣張溥

侍讀臣孫球覆勘

總校官知縣臣楊懋珩

校對官中書臣潘奕雋

膳錄監生臣徐莊

欽定四庫全書

梁谿集卷一百二十五

宋 李綱 撰

書十八

與張相公第十書

與張相公第十一書

與張相公第十二書

與張相公第十三書

與張相公第十四書

與張相公第十五書

與張相公第十六書

與張相公第十七書

與張相公第十八書

與張相公第十九書

與張相公第二十書

與張相公第十書

九月九日

某累以本路軍馬上干鈞聽被受劄命書賜每蒙許以
遣發豈勝感激然俟望之切歲云暮矣尚未有至者辱
近教乃承諭以俟有警急乃遣第深惘然相公總重兵
以臨大敵方事之棘固難於分人然某亦荷甄陶付以
一路重寄無兵無將何以為防捍之計緩急有警言而望
遣援其能及乎更望垂念所以處已處人者兩盡其宜

不勝幸甚謹具稟目并遣屬官羅薦可詣行府諮稟伏
幸鈞察

某前乞軍馬萬人今豈敢望此但得朝廷量行差撥本
司隨宜措置足矣喋喋干冒亦非謂得此兵便可倚仗
以捍強敵但欲王靈所及人心自安盜賊自弭風聲所
暨或銷患於冥冥非苟相公知照何敢及此昨被行府
劉命欲先次遣兵討蕩虔寇今州郡預備錢糧尋即行
下聞作過者頗戢歛今既閱時殊無事實又復紛紛動

以千百為羣至敢窺伺州縣如吉州近日告獲虔賊數十人皆散在民間欲為內應幸而彰露使稍有虞豈不貽朝廷憂哉荷相公期待之厚豈忍使愁坐於此朝夕惴惴若無所措事迫情切不覺叨叨死罪死罪

某衰病無堪仰荷上恩委寄之重黽勉自效不敢少暇邇來措置錢糧製造器甲修建營房嘗治城壁漸嚮就緒所乏者軍馬耳如蒙相公少分麾下數千人使某得以為朝廷保守一方討捕虔吉間寇盜一變舊習復有

承平氣象亦不虛度歲月然後幅巾柴車返于故棲區
區之願足矣幸望鈞察所遣羅薦可佳士頃在高郵立
節甚著學問行義皆有過人者願與之進不勝幸甚幸
甚

別幅蒙誨諭非荷相公愛念何以及此今大將重兵列
屯淮泗敵人必亦嘯聚有以待我王師欲亟進則恐勝
負之勢或未可知欲相與持久則又有師老財費錢糧
匱乏之憂此宜相公夙夜之所軫慮也

岳飛捷音係路此可喜亦可懼頗聞驕偽之謀欲捐州
縣以深入誘我今所遇之敵皆中土之民非勁騎也王
師既到宜其望風奔潰若為利誘恐或墮其計中不可
不察大抵今日進兵當以招撫為先得地當以保據為
上則中原漸有恢復之理僭偽漸有逼逐之勢若如平
時入生界得地不守惟以掃蕩為事重失故民之心恐
非策之得者幸望垂念惶恐惶恐

與張相公第十一書

某悚息再拜某已作書方欲遣發適得蘄州報賊馬渡
淮而南以孔彥舟為前鋒步騎相繼莫知其數朝廷必
已聞其詳淮西諸州既得指揮移治則江北全無捍蔽
江南要害去處又無兵將控扼危急之甚束手無可措
畫萬一使遂渡江豫章城壁方欲下手脩治殊未有次
第欲去不可不知相公將何以教之竊料賊兵止是簽
軍朝廷如遣精銳軍馬自淮南合岳侯之兵角舟夾擊
必可取勝而防江之兵又自是一段不可闕也兩劄謹

錄呈出奇之說似或可取願相公深思之醫家療病常患實實而虛虛今日之事亦有此失某嘗以防患故當在不必防處拜稟正欲救此如於實處設疑虛處設實以待之則其勝必矣蒙眷照僭易惶恐之至某悚息再拜

與張相公第十二書

十月二十四日

近者人還特蒙教賜仰荷慰藉之厚累布問記室當盡達鈞覽竊審入覲朝廷從容啓沃復為視師之行霜露

戒寒計亦勞止瞻望黃閣無由少承誨言嚮風悄跂之
至

伏領行府捷報竊承王師大勝賊騎於淮淝之上指蹤
諸將盡出宏規此與謝安遣偏師以破苻堅之衆亦何
以異既與中外共慶尤切歎仰然重兵為後黠敵常態
驟勝而驕兵家所忌願相公深思預防持勝之道有以
待之則前日之捷足以摧其鋒後日之勝足以落其膽
中興之勢成矣更冀於不必防處曲加提備以江西一

路空虛為念深所望於左右也仰恃愛念冒昧及此惶
恐無地

某近者再上章丐閑實以難任重責之故蒙恩不允益
深震懼素荷眷憐必亮此心不以喋喋欲去為罪也或
者謂某蒙相公知炤之厚推挽使處上流重地許兵屢
矣而卒莫之遣似非真相知者是大不然相公以恢復
天下為心某以保守一路為意所職不同各行其志是
乃所以為相知也然我師既勝之後突騎再來必變動

其術醫家欲虛所實而實所虛實處可以設疑虛處必
為隄備江西虛矣願相公深所實之此非謀自為也切
幸無忽

一路將兵聽帥司節制此祖宗法也全將兵許本司勾
抽使喚此近日朝廷行下聖旨指揮也本路將兵盡在
虔吉以有賊盜殘黨之故不欲盡起止令團結一半以
應警急之須虔守孫佑輒占怯不遣如此則何以帥為
可謂失職矣謹具申稟敢望特賜行下不勝幸甚得虞

憲劄目贛上盜賊衰息謹錄拜呈縱有些小所存一半
將兵自足彈壓措置併望鈞照

近承朝廷指揮岳飛分兵屯駐九江至今尚猶未到昨
日得報止遣水軍屯蘄陽要領九江有兵與之相照應
乃為得策更望劄下促其調發甚幸某所乞韓京李貴
兵將之半切望垂念得此則粗可以為聲勢昨已得指
揮聽本路都統節制使喚以討虔寇則藉其力為數月
防冬之備於理似順伏幸留念撥尋至此亦可謂窮急

矣想蒙憫笑也惶恐惶恐

與張相公第十三書

某近者輒以已見利害仰瀆聽覽伏蒙鈞慈既容其拙
直又許以忠嘉感懼之情無以為喻苟有所見敢不自
竭竊覩邸報韓侯淮陽之捷為之喜而不寐已而聞之
北來士大夫頗有異論雖得言多浮其實未必信然要
之王師之舉奠而後發當如破竹建瓴使人心響應則
大勲易集今羣師未動初無牽制策應之師而孤軍獨

住則其進似太銳援兵既至未嘗設伏以謀勝之反為
所困僅能潰圍而出遽還故壘則退似太速而所得郡
縣既不界守必有遭誅屠而失望者此其之所以初喜
中疑而卒以為憂也深慮韓侯忠勇忽於小失率師復
進墮賊計中則安危存亡所繫豈淺淺也伏望相公特
留鈞念使如辛毗者杖節軍門制其輕戰自秋徂冬且
務靜重為自防之計以觀敵人之動靜徐為後圖乃策
之上者秋高馬肥萬一北人南牧而吾之疆場有備以

逸待勞固已得策借使釁端既開而彼不能來則敵人之情可以坐料然後總統羣帥合謀併力迭相應援鼓行而前必有合於天人之願者矣傳曰師能左右之曰以如人之有左右手足運行作止莫不在我乃能如意使平居不能運掉則緩急何所倚仗哉更望相公加意於此勇者抑之使毋銳進惰者作之使毋媮逸賞罰兼用恩威並行則成此武功何遠之有相公蒙上委任之重以一身佩天下之安危而某久荷國恩實與朝廷同

其休戚素荷相公知照之厚直以古人相期則臨大利害敢不展盡底蘊以效區區之愚忠至於出位之罪則非所敢逃也冒昧僭易惶恐無地伏冀裁察

與張相公第十四書

十二月七日

比見朝廷行下諸將捷音前此所未嘗有也指蹤之力實自廟謨中外共慶行岳帥報寇偽相兼侵犯襄鄧信陽兵勢重厚意欲窺圖上流所謀不淺緣荆湖接連江西一帶地里濶遠別無軍馬屯駐深慮岳帥孤軍難以

獨力支梧欲望朝廷遣發策應之師庶幾可以捍禦決
收奇功已具申稟伏望鈞慈特賜詳察不勝幸甚

某畧以本路乏防冬之兵仰干鈞聽重蒙下諭良深愧
戢今日淮西既捷得以少安實賴鈞芘第襄漢之寇復
爾侵擾本路終以空虛之故不能自保岳侯屯駐九江
蕪陽軍馬悉已將帶前去沿江千里略無控扼夙夜不
遑更望鈞慈特賜垂念非獨某之幸也

竊聞淮西之捷實緣鈞旆親屆當塗號令督戰所致古

人用兵投機之會間不容髮良切欽歎今者敵兵侵擾上流雖岳帥勇銳深慮孤軍難以獨抗不測之虜所係不細相公以身任天下安危如不憚數千里之遠一臨九江武昌大其聲援將士用命決有成功之理四海之望實在於此舉幸望深留鈞念

自昔窺覷東南未有不從上流者今敵人以重兵侵犯襄漢其勢恐非淮西之比包藏禍心必有所在願相公深慮之如劉光世之兵非得相公統大兵以督帥又得

楊沂中為之策應豈能既退而復進變敗而為成岳飛
孤軍獨當荆湖又與江淮接境並無軍馬捍賊實皆上
流重地勢須摘那諸將應援相為犄角乃可倚仗如蒙
鈞旆親臨一號令尤善之善者也為宗社計諒惟不憚
跋涉之勞區區愚慮出此幸望鈞察惶恐無地

某昨被受親筆手詔二道謹募勒上石輒以裝軸碑本
拜納左右幸賜鈞覽

與張相公第十五書

十二月十八日

伏審介圭入覲已遠行朝雖吉甫之歸周邦咸喜無以
過也佇聽策勲膺受多祉續馳慶次諸將屢捷賊馬退
遁邊境寧謐誠宗社之休生靈之福非相公以身任天
下之重冒不測之險以報上恩疇克如此不知且固吾
圉為復遂行進討之策此二者正當審處區區愚見謂偽
齊既屈必且祈哀於金人驕強之衆雖未必來然自此
正恐有勞鈞慮耳

近得岳帥報以偏師屢敗敵人然置蔡不取已遂斂兵

豈有深意耶本謂虜偽相兼窺伺上流勢須煩鈞旆一
到督諸將犄角應援可成大功今既如此願且當軸處
中以觀機會徐為後圖今日之事惟當自治待時而奮
根本壯而枝葉不足慮也切望留念惶恐惶恐

某承乏於此忽見歲暮初以防冬軍馬缺乏為憂今賴
王師之捷遂免踈虞一方寧謐實自鈞芘所致豈不知
幸第衰病相仍憂慮過當髭髮盡白非復昔年侍坐之
時深願退處閑散漸為歸老之計止候春初解嚴即力

申前請敢望鈞念深所望於門下也

少意仰瀆鈞聽本路雖得一稔然去歲旱暵之甚民力
未蘇起催戶貼錢萬數浩瀚頗以為苦又月椿錢運赴
湖北遂覺錢荒如蒙朝廷令作兩限催理及許折納斛
斗庶幾少寬民力用關子和糴若支請無阻誠為利便
本司近就洪州充二萬緡回易正合所降法意乃為建
康榷貨務阻難恐非所以取信於遠方皆具狀申稟敢
望鈞慈早賜指揮行下不勝幸甚

與張相公第十六書

十二月十八日

自淮上王師屢捷之後邊境寧謐惟襄漢間尚有出沒
岳帥累挫其鋒防冬遂可無虞實自相公以身任天下
之重略不世出之所致顧如某者濫當一路之寄亦賴
芘輝得免曠敗其為感服豈易具陳輒有已見二事具
劄子奏聞副本謹錄上呈或可施用幸望采覽不勝惶
恐

本司當邊報警急之際依准行府指揮勾抽虔州一半

將兵欲就松江控扼使喚守臣孫佑妄以盜賊為名占
愆不遣雖蒙朝廷再降指揮並不依應今來諸路大兵
捍退賊馬松江平寧本司目前不須前件將兵已劄下
虔州權免起發深慮本路諸州自此解體不復遵稟本
司節制緩急難以調發已具奏聞及送袁州取勘外敢
望鈞慈特賜詳察兼契勘本路將兵舊有指揮分上下
半年更戍洪州緣中間罷帥司及虔州撥隸湖北路遂
盡數遣還近年雖復舊制緣有朝廷差到大使司兵三

萬人不復申請今具狀申稟伏乞早賜指揮施行不勝
幸甚

伏蒙委置建康木植已累行下虔袁等州計置應副得
逐州報悉皆推托緣本路出產木植止此數州雖已再
行催促更望朝廷行下庶幾不敢弛慢如虔守孫佑凡
係本司依例合責辦諸州事件並不應副非獨占吝將
兵而已如某方欲引退豈敢復與之校但帥司事體恐
自此廢更望鈞慈曲賜詳察

某夏初抵豫章忽見歲杪緣一念之故措置諸事稍稍就緒今茲防冬仰賴庇庥又得無虞寧不知幸第衰病日加頓覺心力不逮前時止候開春即伸前請干告朝廷求就閑散已嘗布露腹心敢望鈞慈豫擇代者使得便脫此莫大之幸李光端明如未召還亦當處之方面以之代某必有可觀仰恃眷憐輒敢及此惶恐無地

與張相公第十七書

正月十三日

竊以自昔創業中興之主必有不二心之臣為之輔翼

相與以誠乃克大有為於天下仰觀聖主待遇元勲禮
無與二而相公精忠許國身任安危可謂無愧於古矣
修政攘戎削平僭偽坐收恢復之功祇在朝夕區區不
勝傾望依歸之至

自去冬王師大捷之後邊境寧謐中外晏然禦侮折衝
之功可謂盛矣竊聞車駕決策駐蹕建康茲惟其時然
淮南藩籬謂宜料理審擇要害之地建築城壘以為控
扼預備不虞區區愚見僭易浼聞不勝惶恐

某竊謂朝廷欲致中興用兵祇是一事要當以進人材
修政事固根本明是非分別君子小人為先惟相公留
意天下幸甚幸甚

某屢致書拜懇以衰病相仍心力不逮難當繁劇欲丐
閑散今幸防冬無虞仰託鈞庇得免曠敗可遂前請已
具奏聞乞罷帥事除一在外宮觀敢望鈞慈察其非敢
備禮特賜陶鑄使得養疾山林漸為歸老菟裘之計仰
荷厚德何有窮已干冒不勝悚息之至

本司有申朝廷數事不敢以欲去之故遂廢陳稟輒具
劄子拜呈敢望鈞慈特賜詳酌行下不勝幸甚

與張相公第十八書

正月十五日

近與漕司同具奏及申朝廷以虔賊謝小鬼等聚集數
千人侵犯吉州殘破永豐吉水兩縣逼近州城作過潰
散官兵本司已遣發兩頭項軍馬前去討捕深慮兵數
不多難以捍禦乞自朝廷就近摘那兵將應副捉殺及
聞朝廷見勾抽福建統制官王進軍馬赴行在乞降指

揮令就便前來權聽使喚候討捕了日發回伏望鈞慈
早賜詳酌施行一路不勝幸甚

春首農事方興又當官司受納裝發之際盜賊猖獗為
患不細如殘破永豐吉水兩縣所失錢穀甚多殺戮慘
酷實緣虔守以鄰境為壑本司兵力單弱不能鎮服所
致吉州兩日來未得賊退之報筠袁諸邑已有微顰者
深慮滋蔓難制伏望鈞慈以一路生靈財賦為念早賜
遣發王進軍馬會合討捕庶幾兇徒速就平殄干冒不

勝悚息之至

與張相公第十九書

正月三十日

伏蒙鈞慈以今日進守之計下詢顧惟迂踈豈足與此
竊謂進守一道也能守然後能進正猶弈棋自固然後
能勝敵今車駕將幸建康楚泗皆已修堅城其策得矣
廬壽襄鄧恐亦須如此措置更宜深考古跡如濡須塢
牛渚圻之類築壘屯兵以備不虞使犬羊不能侵突
虎有以養威見可而進今日之至計也奏御劄子輒錄

副本拜呈敢望鈞察冒昧惶恐之至

虔賊謝小鬼等結集兇徒數千人侵犯吉州破永豐吉
水兩縣潰散官軍驅執將佐殘害甚衆本司遣兩項軍
馬前去討殺并督將兵會合掩擊幸獲勝捷已催督進
兵追襲窮捕第恐兵力單弱未能盡其根株如蒙朝廷
濟師乘此閒暇之時掃蕩巢穴使舊習稍革良民得以
安業亦是一事更望鈞慈詳酌一路幸甚幸甚

某惶恐適得吉州李守書具道盜賊曲折輒錄拜呈伏

乞鈞照

某承乏豫章踰年仰託大庇幸免曠敗豈勝感激今安撫司并洪州諸事粗已就緒惟修城一事不欲勞民隨宜措置以徐圖之樓櫓器具悉皆新創異時成就實為永利伏幸鈞察

某近具奏以衰病難當繁劇乞罷帥守改除宮祠未蒙俞允伏見邸報司諫陳公輔援靖康伏闕事求去區區愚分尤不自安再申前請敢望鈞慈矜憐早賜陶鑄保

全晚節實有望於相公切冀垂念惶恐無地

與張相公第二十書

二月二十五日

伏奉道君太上皇帝崩訃哀慟號絕五情糜潰君臨天下二十有六載而陟方於遐域此固臣子所同痛憤矧在廊廟何以堪處枕戈嘗膽修政攘戎以報不天之讎以刷中國之耻實有望於朝廷今日不勝哀懇激切之至

本司近以虔賊侵犯鄰郡丐兵于朝伏蒙差撥李貴一

項軍馬應副仰荷鈞念虔寇已遣本司兵將會合討捕
勤殄數項亦有受招安者餘黨漸歸巢穴目前粗定深
慮官軍既退復出為惡已留兵屯廬陵及檄虔守措置
李貴者尚在汀州未得來信已令助虔州招捉矣伏望
鈞慈

近被朝旨措置創建贍軍酒庫以助月樁養兵之費既
蘇民力又使州郡無窘迫之憂誠得策也然尚有可議
者內一項應州郡有田易酒庫並罷契勘本司自置司

以來即有田易酒庫收息錢以贍給一司官吏將佐軍
兵搞設激賞百色之費盡出其中若罷去即用度頓缺
須至仰煩朝廷況與今來贍軍酒庫自不相妨措置得
宜決可赴辦課利饒衍應副月樁沛然有餘若罷此興
彼使本司頓然缺乏恐未盡善輒具利害申明敢望鈞
慈詳酌特降指揮許令存留不勝幸甚幸冀照察

本司有申稟朝廷數事未奉指揮皆迫切不可已者敢
望鈞旨早賜行下不勝幸甚干冒悚息

邇來淮西襄漢間頗有探報當是偽齊以此示其未衰
不然潰兵之來不難取勝正在朝廷過為隄防蓄銳養
威以待之蔑不濟矣率易及此惶恐惶恐

某以衰疾難堪繁劇再上章丐祠館未奉俞允敢望鈞
慈察其誠懇非為備禮早賜陶鎔使得歸安山林保全
晚節莫大之幸素荷眷照疊有塵瀆惶恐無地

梁谿集卷一百二十五